

ՀԱՅԱՍՏԱՆԻ ԱՌԱՋԻՆ ՀԱՆՐԱՊԵՏՈՒԹՅՈՒՆԸ ԵՎ
ԱՆԿԱՆՈՒԹՅԱՆ ԿՈՐՍՏԻ ՀԻՄՆԱՀԱՐՑԸ ՎԱՀԱՆ ԹԵՔԵՅԱՆԻ
ՀՐԱՊԱՐԱԿԱՆՈՍՈՒԹՅՈՒՆՈՒՄ (1918 – 1922 թթ.)*

ԳՈՌ ԱԲՐԱՀԱՄՅԱՆ

Բանալի բառեր՝ Վահան Թեքեյան, հրապարակախոսություն, Հայաստանի առաջին Հանրապետություն, Հայկական հարց, Սփյուռք, ազգային ինքնություն, Արևմտյան Հայաստան:

Ամփոփում

Արևմտահայ, այնուհետև սփյուռքահայ նշանավոր գրող, հրապարակախոս, հասարակական-քաղաքական գործիչ, հայկական լիբերալ-ժողովրդավարական քաղաքական հոսանքի վառ ներկայացուցիչ Վահան Թեքեյանի (1878–1945) հրապարակախոսությունում Հայաստանի առաջին Հանրապետության ընկալումն ու մեկնաբանությունը դիտարկվում է Հայկական հարցի և ազգային պետականության վերականգնման, ապա ինքնիշխանությունից զրկման համատեքստում: Սփյուռքահայ ինքնություն և ազգային պետականության փոխհարաբերությունների շրջանակում առանձին ուղադրության է արժանանում Թեքեյանի հրապարակագրության դերը սփյուռքյան քաղաքական մշակույթի ձևավորման, ազգային օրակարգերի սահմանման և համահայկական համերաշխության վերարժևորման գործընթացներում:

Հիմք ընդունելով հրապարակախոսության սոցիալ-քաղաքական, վերլուծական գործառույթը՝ վեր է հանվում Թեքեյանի գաղափարական դիրքորոշման էվոլյուցիան՝ Հայաստանի առաջին Հանրապետության հանդեպ նախնական քննադատական վերաբերմունքից դեպի դրա ընկալումը որպես հայ ինքնություն պահպանման և պետականության վերականգնման առանցքային հանգրվան:

Միևնույն ժամանակ Թեքեյանի հրապարակախոսության դիտանկյունից անդրադարձ է կատարվում արևմտահայ ու արևելահայ ինքնությունների գաղափարական բեկումնացման, արևմտյան պետությունների հանդեպ հույսերի մաշման և Հայաստանի խորհրդայնացման հանդեպ հանդուրժողականության ձևավորման միտումներին: Դրանք վկայում են սփյուռքահայ քաղաքական մտածողության անցումը իդեալիզմից դեպի իրատեսություն, ինչպես նաև Սփյուռքի ու հայրենիքի միջև խառը ինքնության ձևերի կայացումը:

* Ներկայացվել է 30. IV. 2025 թ., գրախոսվել է 05. V. 2025 թ., ընդունվել է տպագրության 17. XI. 2025 թ.:

© Հեղինակ/ներ, 2025: Հասանելի է Creative Commons Attribution 4.0 Licence-ին համապատասխան:

Նախաբան

Սփյուռքահայ իրականությունում հրապարակախոսությունը տասնամյակներ շարունակ ունեցել է գաղափարական, քաղաքական և մշակութային ինքնակազմակերպման առանցքային նշանակություն: Այն ոչ միայն արձանագրել է Սփյուռքի բազմաշերտ, խառը մշակութային ինքնության փոփոխության ընթացքը, այլ նաև միաժամանակ խթանել ձևափոխումը: Սփյուռքում այն դարձել է հասարակական կյանքին մասնակցության գործիք, հանրային կարծիքի ձևավորման միջոց և ազգային ինքնության վերաիմաստավորման հարթակ:

Այս իմաստով արևմտահայ, ապա նաև սփյուռքահայ նշանավոր գրող, հրապարակախոս, հասարակական-քաղաքական գործիչ, հայկական լիբերալ-ժողովրդավարական քաղաքական հոսանքի վառ ներկայացուցիչ Վ. Թեքեյանի հրապարակագրական հարուստ ժառանգությունը, առանձնանալով իր ուղեգծային հստակությամբ, անհատական յուրօրինակ ոճով, չի կորցրել իր արդիականությունն ազգային ինքնության բաղադրիչների շարունակական վերագնահատման համատեքստում: Հատկապես 1918–1922 թթ. ազգային պետականության թեմատիկայով նրա հրապարակախոսությունը՝ որպես պատմաքաղաքական դրամատիկ հանգուցալուծումներին երբեմն զուսպ, երբեմն զգացմունքային արձագանքների խտացում, հետաքրքրական է հատկապես մեղիաքաղաքականությունն առնչակցությունների, պետականակերտման գաղափարաբանության շուրջ բանավեճերի որակական ուսումնասիրության տեսանկյունից:

Վ. Թեքեյանի հրապարակագրությունը ազգային ինքնության և հրապարակախոսության տեսությունների առանցքում

Հրապարակախոսությունը եղել և մասամբ մնում է սփյուռքի բազմաշերտ խառը մշակութային ինքնության շարունակական փոփոխության խթանիչ: Ըստ հնդիկ ճանաչված մշակութաբան Հոմի Բհաբհայի՝ ինքնությունը ձևավորվում է «միջմշակութային սահմանային տարածքներում»¹: Նա ընդգծում է, որ սփյուռքի կյանքը՝ որպես «տարբեր մշակույթների միջև հաղորդակցություն», ինքնությունը դարձնում է մշտապես ձևափոխվող², իսկ սփյուռքյան ինքնության կառուցման մտահոսքում ձևավորվում է խառը և բազմավեկտոր արժեքային համակարգ:

Հայկական Սփյուռքի էթնոհոգեբանական նկարագիրը ձևավորվել է ոչ միայն Ցեղասպանության հետևանքով տեղահանության և արտագաղթի ազդեցությամբ, այլև հայրենիքի մասին պատկերացումների, հայրենիքի հետ ունեցած իրական կամ խորհրդանշական կապի դինամիկայով: Ազգային ինքնության անքակտելի մասը կազմող հայրենիքի և պետականության մտահայեցումները տարբեր ժամանակաշրջաններում ունեցել են արժեքային, էթնիկ ու քաղաքակրթական տարբեր բովանդակություն: Գերմանացի պատմաբան, սոցիոլոգ, արևելագիտության, հատկապես Հայոց ցեղասպանության և Սփյուռքի հարցերի ուսումնասիրություններով հայտնի Թեսսա Հոֆմանը, օրինակ, նշում

¹ Bhabha. 1994, 1 – 2.

² Bhabha. 1994, 15.

է, որ հայկական Սփյուռքի համար «Հայաստան» հասկացությունը պատմականորեն հանդես է եկել ինչպես իրավաքաղաքական, այնպես էլ բարոյահոգեբանական մեկնակետով³:

1918 թ. մայիսին Հայաստանի առաջին Հանրապետության հռչակումը ինքնության վերաիմաստավորման մարտահրավեր էր ինչպես արևելահայության, այնպես էլ հատկապես արևմտահայության համար, ինչը նախ դրսևորվել է սփյուռքյան հրապարակախոսությունում, ապա վերափոխվել քաղաքականության մեջ:

Հրապարակախոսությունը՝ որպես հասարակական-քաղաքական գործունեության փաստերն արտացոլող, հոգևոր արժեքների հենքին քաղաքական գաղափարները զարգացնող⁴ ստեղծագործության ուրույն տեսակ, Սփյուռքում մշտապես արժևորվել է հայապահպանական հզոր առաքելությամբ: Համեմատաբար փակ համայնքային կամ միջհամայնքային հարաբերություններում տևականորեն մնալով որպես մտավորականության և ընթերցող շրջանակների միջև երկխոսության ամենաարդյունավետ խողովակը⁵ և ինտեգրված լինելով գաղափարախոսական բովանդակություն կրող քաղաքական խոսույթին⁶ սփյուռքահայ հրապարակախոսությունն իրականացրել է մտավոր առաջնորդման գործառույթ:

Հրապարակախոսությունը միշտ արտահայտվում է հեղինակի անձնական աշխարհայացքային ընտրության, հեղինակային խոսքի և ներքին համոզվածության միջոցով, և, ըստ ուղևոր հայտնի բանաստեղծ, էսսեիստ, արձակագիր, թարգմանիչ ու հրապարակախոսության տեսաբան Ա. Պոլոնսկու, դրա հասարակական-վերափոխող դերն անբաժան կապված է նրա հասարակական-դիդակտիկ (ուսուցողական) և հասարակական-լուսավորչական գործառույթների հետ⁷: Այդ պատճառով Սփյուռքում օրինաչափորեն հրապարակախոսության մշակների դերում հանդես են եկել նաև քաղաքական, հանրային, մշակութային կյանքի առաջնորդներ, մտավորականներ:

Այս իմաստով Վ. Թեքեյանի 1918–1922 թթ. հրապարակախոսության մեջ Հայաստանի առաջին Հանրապետության և դրա ինքնիշխանության կորստի գաղափարական մեկնաբանության քննությունը հնարավորություն է տալիս վերաիմաստավորել սփյուռքյան ինքնության փոխակերպումների ընթացքը և արդիականացնել պետական ինքնիշխանության պահպանման առաջնահերթության խնդիրը՝ որպես գոյաբանական հիմնահարցերի լուծման առանցք: Ելնելով դրանից՝ պատմահամեմատական մեթոդի կիրառմամբ վերլուծվել է 1918–1922 թթ. Արևելյան ու Արևմտյան Հայաստանի շուրջ ձևավորված քաղաքական իրադրությունն ու Սփյուռքի դիրքավորումը, իսկ փաստագրական վերլուծության միջոցով վեր են հանվել տարբեր ժամանակներում Վ. Թեքեյանի խմբագրած «Արև» (Ալեքսանդրիա, հրատարակվում է 1915-ից առ այսօր), «Ժողովուրդի ձայնը» (Կ. Պոլիս, 1918–1920 թթ.) և «Ժողովուրդի ձայնը-Ժամանակ» (Կ. Պոլիս, 1920–1924 թթ.) թերթերում հրապարակված շուրջ հիսուն տպագիր

³ Hofmann. 2011, 100.

⁴ Горохов. 1975, 192.

⁵ Кройчик. 2015, 139 – 148.

⁶ Мисонжников. 2000, 95–122.

⁷ Полонский. 2008, 56–61.

նյութեր: Թեքեյանի հրապարակախոսական տեքստերի գաղափարական հիմքերը դիտարկվել են բովանդակային վերլուծության մեթոդով: Առավել լայն համատեքստ ապահովելու նպատակով նրա դիրքորոշումները համադրվել են հայկական մամուլի («Ասպարէզ», «Աշխատանք», «Խորհրդային Հայաստան») այլ հրապարակագրական կամ տեղեկատվական անդրադարձների հետ: Թեքեյանի հրապարակագրական գործունեության ուսումնասիրությունն ուղղափառվել է հատկապես նրա հանրային և քաղաքական գունեղ գործունեության, դրա արդյունքում ձեռք բերած մեծ հեղինակության համատեքստում: «Թեքեյանի ամբողջ կեանքը իր արտայայտությունն է բոլոր ձևերում մէջ՝ կռիվ մը եղաւ: Պայքար՝ մահուան դէմ: Ազգին եւ հայրենիքին իսկական շահը (որուն դուք կր'սեք գերազոյն շահ) գայն սխալ նշանակէտերու առաջնորդողներու դէմ», – Թեքեյան գործչին այսպես է բնութագրել նրա ժամանակակից, Թեքեյանին նվիրված գրքի հեղինակ Իսահակ Ծ. Վրդ. Ղազարյանն իր հուշերում⁸:

Հայոց պետականության հռչակումը և արևմտահայ հասարակական մտքի արձագանքը Թեքեյանի հրապարակախոսության մեջ (1918–1919 թթ.)

Տարածաշրջանային ռազմաքաղաքական բարդագույն իրադրությունում 1918 թ. մայիսին Արևելյան Հայաստանի մի մասի վրա Հայաստանի Հանրապետության ձևավորումը նոր կազմավորվող Սփյուռքի ոչ դաշնակցական շրջանակների կողմից միանշանակ չընդունվեց: Պատճառը հիմնականում այն էր, որ արևմտահայությունն անվերապահ հավատում էր Առաջին համաշխարհային պատերազմից հետո Փարիզում մեկնարկած Խաղաղության կոնֆերանսի արդյունքում Արևմտյան Հայաստանին անկախություն չնորհելու կամ Արևմտյան ու Արևելյան Հայաստանների միավորմամբ հայկական ընդհանուր պետության ստեղծման հնարավորությանը: Եվ ապագա Միացյալ, Անկախ Հայաստանի տեսլականում Արևմտյան Հայաստանին վերապահվում էր կենտրոնական, գերակայող կարգավիճակ՝ ելնելով այն մտայնությունից, որ հայության պատմական հայրենիքը մեծ մասամբ հենց Արևմտյան Հայաստանի տարածքին է համընկնում:

Այս տեսակետից արևմտահայությունը շուրջ 12000 կմ/ք տարածքի վրա Հայաստանի Հանրապետության ստեղծումը գնահատում էր իբրև ողորմելի «նվեր» օսմանյան իշխանությունների կողմից՝ մեկընդմիջտ փակելու համար Հայկական հարցի և իր պատմական բնօրրանում սեփական պետությունն ունենալու արևմտահայության պահանջների էջը: «Թիւրքերը այդ ատեն տասներկու հազար քիլոմեթրո հող ճանչնալով ի նպաստ հայոց, և այն ալ ո՛չ թէ իրենց սահմաններէն, այլ երբեմնի ռուս կայսրութեան հողամասէն՝ կը կարծէին ապագայ խաղաղութեան համաժողովին կնճիռներէն մին-հայկական փշոտ հարցը – միանգամայն ընդմիջտ լուծուած ըլլալ»⁹, – Եգիպտոսում լույս տեսնող «Արև»-ում գրում էր հրապարակախոս Լևոն Մկրտչյանը:

Այսպիսի հանրապետության ստեղծումը գնահատվում էր որպես Հայկական հարցի լուծմանն ավելի շատ վնասող իրողություն: Հանրապետության թերարժեքում, անկենսունակության համար ընդհուպ տնտեսական, աշխարհագրական հիմնավորումներ էին փորձում գտնել: «Ժողովուրդի ձայնը» թերթում,

⁸ Ղ ա գ ա Ր յ ա ն. 1984, 36:

⁹ «Արև» (Ալեքսանդրիա), 29. XI. 1918:

օրինակ, հրապարակախոս Հայկազուն Արամյանը գրում է. «Կովկասի Հայաստանը առանձին առնելով, աշխարհագրապես ու ազգագրապես զուրկ է անկախ պետություն մը կազմելու ամենաէական պայմաններէ: Նա միշտ բանտի մէջ պիտի մնայ: Ոչ Կասպից Ծովը և ոչ ալ Սև Ծովը կրնան զինք կշտացնել»¹⁰:

Անգամ Ազգային պատվիրակության նախագահ Պողոս Նուբար փաշան Փարիզում Հայաստանի Հանրապետության տարեգարծին նվիրված հանդիսավոր միջոցառման ժամանակ, ՀՀ խորհրդարանի նախագահ և Փարիզի Հայաստանյան պատվիրակության ղեկավար Ավետիս Ահարոնյանի ներկայությամբ անդրադառնալով Ռուսահայաստանում Հանրապետության ստեղծման փաստին, այն արժեւորում է միայն ապագայում Միացյալ և Անկախ Հայաստանի մաս դառնալու համատեքստում. «Որքան խանդավառութեամբ կը լցուին մեր սրտերը այն մտածման առջև թէ, մօտաւոր ապագայի մը մէջ, անկախ պիտի գայ միանալ օսմ. տիրապետութենէ ազատագրուած թրքական Հայաստանին, կազմելու համար անոր հետ Հայկ. Ամբողջական Պետութիւնը ...»¹¹: Նման դիրքավորման համար հիմք էին ծառայում Փարիզի կոնֆերանսից առաջ Ազգային պատվիրակության ունեցած մարտավարական որոշ հաջողությունները: Նախ, որ Փարիզի կոնֆերանսից առաջ հայ ժողովուրդը ճանաչվել էր աշխարհամարտից տուժած ժողովուրդ, ինչը հնարավորություն էր տալիս, որպես Անտանտի հաղթած երկրների դաշնակից, ապագա հաշտության բանակցություններում հանդես գալու իր խախտված իրավունքների վերականգնման պահանջատիրոջ դիրքերից: Երկրորդ՝ Ազգային պատվիրակությունը կարողացել էր Փարիզի կոնֆերանսին ընդառաջ, իբրև հայ ժողովուրդի շահերը ներկայացնող և նրա անունից հանդես եկող իրավաքաղաքական սուբյեկտ, օրինական ճանաչվելություն ձեռք բերել հաղթող երկրների շրջանում:

Վերջին հանգամանքը ոգևորության ալիք էր բարձրացրել աշխարհասփյուռ Հայության շրջանում՝ տուրք տալով մաքսիմալիստական պահանջներին: Օրինակ՝ Յրեզնոյում լույս տեսնող ՀՅԴ պարբերաթերթ «Ասպարեզ»-ի 1918 թ. դեկտեմբերի 27-ի խմբագրականում, Փարիզի կոնֆերանսի մեկնարկին, նշվում էր. «Մենք կը պահանջենք տաճկական և ռուսական Հայաստանները — Կիլիկիայով միասին, ինչպէս նաև Ատրպատականի նահանգի մէկ կարևոր մասը, որ պարսկական իշխանութեան ներքև կը գտնուի: ... Հայաստանը մերն է մեզի կը պատկանի, մեր տուած անհամար զոհերը այդ միայն կը հաստատեն և մենք այսուհետև գիշողութիւն պէտք է ցոյց տանք մեր արդար պահանջին մէջ»:

Լինելով ազդեցիկ քաղաքական գործիչ և անձամբ մտերմություն ունենալով Պողոս Նուբար փաշայի հետ, վստահելով վերջինիս հայրենասիրական մղումներին՝ Վ. Թեքեյանը ևս ի սկզբանե տողորվել էր հենց Թրքահայաստանի առաջնորդությամբ Միացյալ Անկախ Հայաստանի ստեղծման գաղափարով: Հարցին ավելի գործնական մոտենալով՝ նա առաջնային էր դիտում արդեն ապագա Հայաստանի կառավարման և կառավարության ձևավորումը, թեև անձամբ իր համար այլընտրանք չկար. այդ դերը նա միանշանակ վերապահում էր Ազգային պատվիրակությանը:

Դեռ 1917 թ. ապրիլին, երբ պատերազմն ընթացքի մեջ էր, Թեքեյանն իր հոգեզավակը հանդիսացող «Արև» օրաթերթի «Ազգային կառավարություն»

¹⁰ «Ժողովուրդի ձայնը» (Կ. Պոլիս), 19. IX. 1919:

¹¹ «Ժողովուրդի ձայնը», 02. V. 1919:

խոսուն վերնագրով խմբագրականում այդ ընտրանքը հիմնավորում էր հետևյալ կերպ. «Ազգային Պատուիրակությունը գլուխն է այդ իշխանությունն, եւ Պատուիրակութեան հովանիին տակ գործող մարմինները՝ ներկայացուցիչները, բազուկներն են այդ իշխանութեան ...»¹²: Այս տեսանկյունից Հայաստանի Հանրապետության ստեղծումից հետո Ազգային պատուիրակությանը վերապահվող այդ կարգավիճակը, փաստորեն, դրվում էր հարցականի տակ, ապօրինականացվում էր առնվազն Արեւելյան Հայաստանի հայության անունից հանդես գալու նրա իրավունքը: Դա էր պատճառը, որ Հայաստանի Հանրապետության հռչակումը գաղթած խմբերի ոչ դաշնակցական և մեծամասամբ նաև ապաքաղաքական շրջանակների կողմից հավասարեցվում էր ընդհուպ ազգային դավաճանության: «Ասպարէզ»-ն այդ միջոցով ներկայացնում է հետևյալ կերպ. «Երկու միլիոն կովկասահայությունը աննման դիւցազնամարտ մը մղած էր թրքութաթար վռհմակներու դէմ և իր անկախութեան դրօշը բարձրացուցած Մասիսի ալեհեր կատարին վրայ: Այս իրողությունը փոխանակ մեր սրտերը անհուն յարգանքի զգացումներով լեցնելու դէպքի Կովկասահայությունը, ընդհակառակը առիթ տուաւ ..., որ դաւաճան հռչակեն նահատակուող հերոսները և հեռաւոր օվկիանոսներու այս ափերուն թուք ու մուր նետեն մահուան ստուերովը շառագունած անոնց մաքուր, անբիծ ճակատներուն: ... Ահարոնեանը հռչակվեց «Էնվէրի եղբայր», Խատիսեանը «Թրքացած հայ մը, իսկ Դաշնակցությունը «դաւաճաններու վռհմակ մը»»¹³:

Ստեղծված իրավիճակը հաղթահարելու նպատակով 1918 թ. դեկտեմբերին Պողոս Նուբար փաշան հայտարարում է Փարիզում համազգային համագումար (Համազգային խորհուրդ) հրավիրելու մասին, որը պետք է մեկնարկեր 1919 թ. փետրվարի 1-ին՝ մասնակցությամբ ինչպես հայկական գաղթած խմբերից, այնպես էլ Ռուսահայաստանից ընտրված պատուիրակների¹⁴: Նպատակն էր, Հայաստանի Հանրապետության ստեղծման և արդեն իսկ առկա կառավարության գոյության փաստի անտեսմամբ, հայության բոլոր հատվածների համաձայնությամբ ողջ ազգի անունից հանդես գալու բացարձակ իրավունքի վերապահումը Ազգային նոր պատուիրակությանը: Փաստացի Պողոս Նուբար փաշան խնդիր էր դրել Ամենայն հայոց կաթողիկոսից ստացած մանդատը փոխարինել Համազգային համագումարով, այսինքն՝ ողջ հայության կողմից ստացած մանդատով¹⁵: Ավելին՝ ամրապնդելու համար այս իրավունքը՝ ի հեճուկս Հայաստանի Հանրապետության և վերջինիս պետական իշխանության մարմինների գոյության, Ազգային պատուիրակությունը 1918 թ. դեկտեմբերի վերջին հռչակում է Միացյալ Հայաստանի անկախության մասին¹⁶: Դա նաև տակտիկական քայլ էր Փարիզի համաժողովի հիմնական դերակատարներին փաստի առջև կանգնեցնելու և այդ ինքնահռչակումը միջազգայնորեն վավերացնելու օրակարգ ձևավորելու համար:

Բուն Համազգային համագումարն իր աշխատանքներն սկսում է 1919 թ. փետրվարի 18-ին և շարունակում մինչև ապրիլի 22-ը՝ անցկացնելով 38 նիստ:

¹² «Արև», 02. IV. 1917:

¹³ «Ասպարէզ», 04. IV. 1919:

¹⁴ «Ժողովուրդի ձայնը», 09. I. 1919:

¹⁵ «Ժողովուրդի ձայնը», 08. I. 1920:

¹⁶ «Ասպարէզ», 27. XII. 1918:

Համազգային խորհրդի նիստերին դիտորդի կարգավիճակով ներկա էր նաև Փարիզի համաժողովին մասնակցելու համար Ֆրանսիայի մայրաքաղաք ուղարկված Հայաստանի Հանրապետության պատվիրակությունը¹⁷։ Ընդ որում չնայած Փարիզի խաղաղության զազաթափողովին հայկական պահանջների հայտադրի միասնաբար մշակմանը և Առաջին համաշխարհային պատերազմի ընթացքում Արևմտյան ու Արևելյան Հայաստաններին պատճառված վնասների միասնական չափի որոշմանը՝ Համազգային համագումարը փաստացի չի կարողանում ընդհանուր հայտարարի գալ Միացյալ Անկախ Հայաստանի ամբողջական շահերը ներկայացնող ապագա կառավարության հարցի շուրջ, որը, ըստ էության, Համազգային համագումարի հիմնական խնդիրներից էր։ Արդյունքում, որպես միջանկյալ լուծում, որոշվում է ձևավորել միայն Ազգային նոր պատվիրակություն կառավարության ձևավորման հարցը թողնելով հրավիրվելիք նոր համագումարին¹⁸։

Այդպիսով՝ Հայաստանի Հանրապետության ստեղծման և Ազգային պատվիրակության կողմից Միացյալ Անկախ Հայաստանի հռչակման, Փարիզի համաժողովին երկու հայկական պատվիրակություններով ներկայանալու, կառավարության ձևավորման հարցում համաձայնության չհանգելու և Համազգային համագումարին ՀՀ պատվիրակությունը ոչ լիարժեք ձայնի իրավունք տալու հանգամանքների հանրագումարում հայկական պահանջատիրությունը, հայեցակարգային առումով, երկատվում է։ Այլևս անթաքույց է դառնում, որ ՀՀ-ի և Սիյուռքի հայության մտավորական շրջանակների մեջ պահանջատիրությունն ընկալվում է երկու փոխբացառող երակներից. մի կողմից՝ Միացյալ Հայաստան թրքահայաստանի հենքի վրա և Ազգային պատվիրակության իշխանությունը, մյուս կողմից՝ Միացյալ Հայաստան՝ իրական հողի վրա գոյություն ունեցող Հայաստանի Հանրապետության հենքի վրա ու վերջինիս կառավարության առաջնորդությունը։

... 1918 թ. մայիսին Հայաստանի Հանրապետության հռչակումը և դրանից հետո սկսված պետականաստեղծման ընթացքը նախնական շրջանում աննկատ է թողնվել Վ. Թեքեյանի կողմից։ Նրա խմբագրապետությամբ գործող «Արև» թերթը շուրջ մեկուկես ամիս առհասարակ որևէ անդրադարձ չի կատարել պատմական այդ իրադարձությանը։ Թերթի այդ շրջանի հրապարակումներից տպավորություն է կարծես չի եղել Սարգսրապատի հաղթական գոյապայքարը, դրա արդյունքում ազգային պետականության վերականգնումը։

Թեքեյանն ինքն այդ շրջանում որևէ հրապարակագրությամբ չի անդրադարձել թեմատիկային։ Վերջինս ուշագրավ է նաև այն տեսանկյունից, որ Հայաստանի առաջին Հանրապետությունը ձևավորվեց հայ-թուրքական պատերազմի հետևանքով կրած տարածքային ցավոտ կորուստների արդյունքում։ Հանգամանք, որ կապակցվելով Ցեղասպանության աղետալի՝ հայրենազրկման հետևանքի հետ՝ տրամաբանորեն ավելի զգայուն պետք է լիներ հենց արևմտահայ մտածողության համար։

Թեքեյանի ավելի ուշ հրապարակումներում որոշակի զսպվածությամբ ի հայտ են գալիս կոնկրետ որակումներ, գնահատողական վերաբերմունքի որոշակի դրսևորումներ։ Այսպես՝ 1918 թ. օգոստոսի 30-ին «Արև»-ում հրապարակված «Ազգային պատուիրակությունն ու իր նախագահը» խմբագրականում

¹⁷ «Ժողովուրդի ձայնը», 07. V. 1919:

¹⁸ «Ժողովուրդի ձայնը», 02. V. 1919:

նորաստեղծ Հայաստանի Հանրապետությունը նա անվանում է «Արարատի թզուկ Հանրապետություն»:

Վերաբերմունքի որոշակի փոփոխություն է տեղի ունենում 1918 թ. վերջին, երբ Առաջին աշխարհամարտի արդյունքներով պայմանավորված՝ Հայաստանին են կցվում Արևելյան Հայաստանի մինչ այդ թուրքական զորքերի կողմից գրավված տարածքները: Այս փաստից ոգևորված թեքեյանը «Արև»-ի միջոցով նույնիսկ այնպիսի միտք է դնում շրջանառության մեջ, որը սովորաբար փուլում նորարարական էր: Մասնավորապես, ոգևորված Հայաստանի Հանրապետության տարածքային ընդարձակման փաստով՝ 1918 թ. դեկտեմբերին գրում է. «... Կը մնայ մեզի աշխատիլ և պահանջել որ երէկուան թրքահայաստանն ու Կիլիկիան միանան այս նոր պետութեան հետ ու հայկական հայրենիքին ամբողջութեամբ կազմեն միակ պետութիւն մը, ինչ որ կատարելապէս համաձայն է արդարութեան և իրաւունքի սկզբունքներուն, ինչպէս նաև արեւմուտքի ճշմարիտ քաղաքակրթութիւնը ներկայացնող Դաշնակից պետութեանց լաւ հասկցուած շահերուն»¹⁹: Այսինքն՝ առաջին անգամ թեքեյանը հնչեցնում է հանրապետականականությունը Հայաստանի գաղափարը՝ հակադրելով արևմտահայ տիրապետող արևմտահայաստանականությունության մտայնությունը:

Մինչև 1920-ականների կեսերն այս միտքն այլևս չի հանդիպում թեքեյանի հրապարակային խոսքում: Սակայն թեքեյանական այս մեկնաբանությունը վկայում է, որ քաղաքական-կուսակցական նախապատվությունների ծխածածկով թի տակ ամեն դեպքում նրա համար սկզբունքայինը ոչ թե այն էր, թե Արևելյան կամ Արևմտյան Հայաստաններից որը մյուսի հանդեպ կունենա գերակայություն, որը մյուսին կկցվի, այլ ազգային միավորումն ու ազգային պետականության գոյությունը ապահովումը:

Եթե 1918 թ. դեկտեմբերի վերջին Փարիզում գտնվող Ազգային պատվիրակությունը չհռչակեր Միացյալ Հայաստանի և Կիլիկիայի անկախությունը²⁰, ապա թեքեյանը գուցե ավելի համարձակ շարունակեր Հայաստանի Հանրապետությունը որպես Հայկական հարցի լուծման բանալի դիտարկելու հայեցակետը:

Չնայած դրան՝ թեքեյանը բոլոր դեպքերում զերծ է մնացել Հայաստանի Հանրապետությանն առնչվող հարցերում իրեն բնորոշ քննադատական կամ դատապարտող ոճաբանությամբ հանդես գալուց՝ ակնհայտորեն փորձելով ձեռնպահ մնալ ավելորդ և, թերևս, ժամանակավրեպ կրքեր բորբոքելու և այդ կերպ օրըստօրե խորացող ներազգային օտարման ու պառակտման պրակտիկան իր հերթին խթանելուց: Թեքեյանը ոչ այնքան թիրախավորել է Հայաստանի Հանրապետությունը, որքան կենտրոնացել է պատերազմում հաղթած դաշնակից երկրների քաղաքական աջակցությամբ Միացյալ Հայաստանի ստեղծման և ճանաչման հնարավորության վրա:

Շրջադարձ Միացյալ Հայաստանի իդից դեպի Անկախ Հայաստանի Հանրապետության արժեքայնացում

1919 թ. մայիսի 28-ին Հայաստանի Հանրապետության կառավարությունն ընդունեց հայտնի «Միացման ակտը», որով հայտարարվեց Արևմտյան Հայաստանը նոր ստեղծված Հանրապետությանը միավորելու մասին և իրեն հռչակեց

¹⁹ «Արև», 25. XI. 1918:

²⁰ «Արև», 30. XII. 1918:

Միացյալ Հայաստանի Հանրապետության կառավարություն²¹: Այս հայտարարությունը տհաճ անակնկալ մատուցեց արևմտահայությանը և հատկապես Ազգային պատվիրակությանը՝ նոր մակարդակի տեղափոխելով վերջինիս և Հայաստանի Հանրապետության միջև քաղաքական ու գաղափարական դիմակայությունը:

Թեքեյանը, որը մինչ այդ՝ 1919 թ. ապրիլին, Փարիզի Համազգային Համագումարի ընթացքում ընտրվել էր Պողոս Նուբար փաշայի գլխավորությամբ ձևավորված նոր Ազգային պատվիրակության անդամ²², անմիջականորեն ներգրավվում է Միացյալ Հայաստանի միասնական, կոալիցիոն խորհրդարան և կառավարություն ձևավորելու, ինչպես նաև վերջինիս մանդատով Փարիզում միասնական պատվիրակություն կազմելու հիմնահարցի լուծման բանակցային գործընթացում: Փարիզում հայկական երկու պատվիրակությունների միջև բանակցությունների արդյունքում էական հաջողությունների չհասնելուց հետո Թեքեյանը՝ որպես Ազգային պատվիրակության բանակցային խմբի ղեկավար, 1919 թ. այցելում է Երևան՝ ՀՀ կառավարության հետ քննարկելու այդ հարցը²³: Բուն բանակցությունները որևէ արդյունքի չեն հանգեցնում²⁴ արձանագրելով արևմտահայ ու արևելահայ հատվածների միջև խորապես կուսակցականացված հակասությունները հաղթահարելու անկարողությունը: Սակայն Թեքեյանը, չնայած բանակցությունների տապալման շուրջ սկսված փոխադարձ մեղադրանքներին, լինելով իրադարձությունների կիզակետում ու կրելով պատասխանատվության հսկայական չափաբաժին, մեծապես զերծ է մնացել հրապարակային վեճերի հորձանուտն ընկնելու և ակտիվ հակադարձումների գայթակղությունից: Հիմնական պատճառը, ըստ էության, այն էր, որ նա խուսափում էր հայկական երկու հատվածների միջև բանակցությունների ձախողման փաստը շահարկումների առարկա դարձնելուց՝ նախ՝ հետագայում նոր երկխոսության հնարավորության կամուրջները չայրելու նկատառումով, մյուս կողմից՝ ինքնին ամոթալի համարելով ազգային հարցերում համաձայնության չհասնելու անկարողությունը հանրային քննարկման թեմա դարձնելը. «... կը մաղթեմ, որ հայկական խնդրին լուծումը ջնջէ այս բանակցութեանց գէշ յիշատակը, մեր եւ մեզի հետ ազգին մտքէն»²⁵: Իր կողմից անցկացված բանակցությունների կտրվածքով այդ զսպվածությունը Թեքեյանն ավելի կարևոր ու նպատակային էր համարում, քան ՀՀ իշխանությունների կողմից «միացման ակտի» ընդունման՝ իր կարծիքով ռազմավարական սխալի կամ երևանյան բանակցությունների ձախողման մեջ ՀՀ դաշնակցական իշխանություններին շարունակաբար մեղադրելու՝ ներքին պառակտումը սնուցող վարքագծին տուրք տալը:

Հատկանշական պետք է համարել, որ ավելի քան մեկ ամիս՝ հոկտեմբերի 13-ից մինչև նոյեմբերի 25-ը մնալով Հայաստանում Թեքեյանը Հանրապետության ներքին դրության մասին լրագրողական որևէ նյութ, նոթագրություն չի

²¹ «Աշխատանք» (Երևան), 03. VI. 1919:

²² «Արև», 18. IV. 1919:

²³ Ա. Լ. պ. օ. յ. ա. ճ. ե. ա. ն. 1988, 247:

²⁴ Ա. վ. ա. գ. յ. ա. ն. 2018, 32:

²⁵ «Ժողովուրդի ձայնը», 15. I. 1920:

հրապարակել: Մարդկային ազնվությունը, թերևս, թույլ չի տվել նրան անտեսելու Հայաստանում առկա սոցիալ-տնտեսական օբյեկտիվ իրավիճակը, այդ թվում՝ արևմտահայ գաղթականության սարսափելի պայմաններն ու նրանց հարցերը լուծելու ուղղությամբ գործադրվող ջանքերը: «Ժողովուրդի ձայնը» թերթի դեկտեմբերի 21-ի համարում նա երկիմաստորեն գրում է. «... ես այլապես մտահոգ եմ, չըսելու համար հուսահատ եմ մէկուկես ամսուան միջոցին երեւանի մէջ միւս բոլոր տեսածներէն՝ քան թէ միացեալ կառավարութեան ստեղծուած չըլլալէն, այդ մասին մեր կատարած աշխատանքին անյաջողութիւններէն եւ այդ առթիւ ուղղուած մեղադրանքներէն»: Չնայած հոգւածուած ներհայաստանյան իրադրության քաղաքականացման որոշակի չեղտադրումներին՝ կարելի է զգալ երևանյան սոցիալական գորչ խորապատկերի վերհուշից առաջացող ներքին ճիչը՝ զսպելու թեքեյանի ինքնակառավարումը՝ միախառնված իրադրությունը փոխելու հնարավորության թերահավատությունը:

Նման զսպվածությունը վկայում է ազգային խնդիրներին կուսակցականի նեղ պրիզմայից դուրս, առավել լայնախոհ հայացքով նայելու հատկության մասին, որը նոր դրսևորում ստացավ Հայաստանի Հանրապետության միջազգայնորեն ճանաչման գործընթացի համատեքստում: Այն կարծես հարմար առիթ տվեց թեքեյանին՝ հաղթահարելու ներքին կապանքները և արտահայտելու նորաստեղծ հանրապետության գոյության փաստի մասին իր իրական անկեղծ զգացողությունները:

Կ. Պոլսում լույս տեսնող ռամկավար-ազատական հայացքներով «Ժողովուրդի ձայնը» 1920 թ. սկզբին խմբագրականով խանդավառությամբ գրում է. ««Ժողովուրդի ձայնը» սրտովին կողմունէ Հայաստանի անկախութեան ճանաչումը, և կը շնորհաւորէ հայ ժողովուրդը որ դարերու հալածանքէն ու տառապանքէն յետոյ վերջապէս կը տիրանայ իր նախահայրերու կառուցած հայրենիքին գէթ մէկ մասին անկախութեան: ... Ասիկա առաջին քայլն է դէպի Ամբողջական Հայաստանի կազմութիւնն և ճանաչումը»²⁶:

Ռամկավարները չեն հրաժարվում Միացյալ Անկախ Հայաստանի իրենց տեսլականից: «Հայկական հարցի բուն առանցքը այն հողամասերն են, որոնք թրքական լուծին տակ կը գտնուէն: Անոնք է որ պէտք է ազատագրուին ու կազմեն Հայութեան հայրենիքը»²⁷, – նշվում է թերթում մեկ այլ խմբագրականում բանաձևելով «Հայաստանն անկախ է, բայց հայկական հարցը լուծուած չէ»²⁸:

Սակայն այս ֆոնին թեքեյանի մտածողության մեջ տեղի է ունենում էական փոփոխություն. գոյություն ունեցող Հայաստանի Հանրապետությունն ածանցյալից վերածվում է միացյալ պետականության վերականգնման ազգային ծրագրի հենակետային սուբյեկտի: Արդեն ընդունելի է համարվում, որ Արևելյան Հայաստանի անկախություն ձեռք բերելու իրավունքի իրացումը ոչ թե որպես Միացյալ Հայաստանի խոչընդոտ պետք է դիտարկել, այլ դրան տանող ճանապարհ կամ հնարավորություն. «Ռուսահայաստանի ազատագրումը կատարուած դէպքերու բերումով, Ռուսական կայսրութեան խորտակումով, աւելի իրաւունք

²⁶ «Ժողովուրդի ձայնը», 14. I. 1920:

²⁷ «Ժողովուրդի ձայնը», 10. I. 1920:

²⁸ «Ժողովուրդի ձայնը», 16. I. 1920:

ուների անկախությունն քան իր դրացիները, որոնք իրենց դատը չնոյնացուցին Դաշնակիցներու դատին հետ: Այո՛, մենք կը խոնարհինք Արարատի դրօշակին տակ, բայց Հայաստանի անկախությունը այն ատեն միայն իսկապէս իրագործուած պիտի ըլլայ, երբ այդ դրօշակը ծածանի նաև Տաւրոսի կատարին վրայ»²⁹:

Սա մտածողական կարևոր տեղաշարժ կարելի է համարել, որը ոչ միայն ընկալ առհասարակ հետազայում Հայաստանի պետականության շուրջ թեքեյանական մոտեցումների արդիականացման հիմքում, այլ նաև նպաստեց, անկախ միջկուսակցական հարաբերություններից, Սիյուռքում Հայաստանի Հանրապետության դրական կերպարի և ինքնին պետականության վերականգնման իբրև ազգային պատմական մեծագույն ձեռքբերման և արժեքի ընկալումների ձևավորմանը: Համընդհանուր այս փոխակերպման խորհրդանշական դրսևորումներն էին մամուլում 1920 թ. մայիսի 28-ը որպես անկախության վերականգնման տոնի վերախմաստավորումը: «Ինչ որ ալ եղած ըլլան – մեր դառնությունները և յուսախաբուծվածները մեծ պատերազմին վախճանէն ի վեր, և ինչ որ ալ ըլլան տխրությունները զորս ապագան կը վերապահէ թերեւս մեզի, կայ և պիտի մնայ սակայն մեծապանծ գերերջանիկ իրողություն մը, հայկական անկախությունը, Հայկական – Անկախ Պետության մը գոյությունը, և ասիկա կը բաւէ որպէսզի մեղմանայ մեր ցաւը անցեալին կորուստներուն համար՝ և վստահութեամբ նայինք ապագային», – գրում է Թեքեյանի «Արև»-ը 1920 թ. մայիսի 28-ին: Արդյունքում հետագա երկու ամիսների ընթացքում թերթը հետևողականորեն լուսաբանում է Սիյուռքի տարբեր համայնքներում Վիեննայից³⁰, Կ. Պոլսից³¹ մինչև Կարկաթա³², Անկախության օրը տոնելուն ուղղված հանդիսությունները: Այսինքն կարելի է փաստել, որ ոչ այնքան Հայաստանի առաջին Հանրապետության հռչակումն ու գոյության երկու տարիներն են Սիյուռքում արմատավորել պետականատիրության զգացումները՝ իբրև ինքնության բաղադրիչներ, որքան Հանրապետության միջազգայնորեն ճանաչումը:

Եթե նկատի ունենանք, որ այս վերաբնակությունը տեղի էր ունենում Հայաստանի կառավարության և Ազգային պատվիրակության միջև ընթացող՝ կռաւիցիոն կառավարություն կազմելու շուրջ բանակցությունների տապալման ֆոնին, նման ընկալումները ներազգային դրվագային միասնականության որոշակի հենապատկերի դեր են կատարում:

Սակայն Փարիզի (1919–1920 թթ.), Լոնդոնի (1921 թ.) և Լոզանի (1922–1923 թթ.) կոնֆերանսներում Հայկական հարցի բովանդակային աստիճանական նահանջը՝ ազգային ինքնիշխան պետության ստեղծման ծրագրից դեպի փախստականների և Թուրքիայում մնացած հայերի կրոնական ու մշակութային իրավունքների պաշտպանություն, ինչպես նաև 1921 թ. քեմալաֆրանսիական համաձայնագրով Կիլիկիայի լիակատար զիջումը Թուրքիային³³, ինչն ուղեկցվեց հայության զանգվածային ելքով այդ տարածքից, արևմտահայության համար ձևավորեցին արմատապես նոր ճգնաժամային իրականություն:

²⁹ «Ժողովուրդի ձայնը», 10. I. 1920:

³⁰ «Արև», 25. VI. 1920:

³¹ «Արև», 14. VI. 1920:

³² «Արև», 21. VI. 1920:

³³ Հայկական հարց. հանրագիտարան. 1991, 146:

Նշված իրադարձություններից առաջացած հուսահատության նոր պլիքը ստիպում էր վերանայելու վերաբերմունքը եվրոպական երկրների խոստումների և, առհասարակ, Թրքահայաստանում հայկական պետականության վերականգնման հնարավորությունների, մեթոդաբանության նկատմամբ և առերեսվել իրական քաղաքականության հետ: 1922 թ. մարտին «Արև»-ի խմբագրականի հեղինակն արդեն դառնությունը գրում է. «Վերջապես Եւրոպան, միակը որ կը հաջողուի ներկայիս, — վար առաւ ... խտէալիսթի այն շողշողուն ու շլացուցիչ դիմակը զոր մեծ պատերազմին ատեն իր վաղնջական դէմքին անցուցեր էր լաւագոյնս խաբելու և իր կողմը քաշելու համար հին և նոր Աշխարհաց մեծագոյն ու փոքրագոյն ազգերը ...: Մեծագոյն գոհուածը — Բարիզի խորհրդածողովին մենք՝ Հայերս եղանք, ինչպէս եղած էինք մեծագոյն գոհր պատերազմին: Ինչո՞ւ: Որովհետեւ, ափսո՛ս, կը ներկայացնէինք մեր բախտին անօրէն տնօրէններուն համար նուազագոյն ուժը և փոքրագոյն շահը»³⁴:

Խմբագրականի նման շեշտադրումները, որոնք արտահայտում էին ինքնիշխան Հայրիկի «Թղթե չերեփի» գաղափարական հայեցումի նորօրյա արձանագրումները, վերահաստատում են, որ հանրային-քաղաքական միտքը շարունակում էր միջազգային քաղաքական իրողություններին զգացմունքային ընկալումներով, «չարի և բարու» բարոյաէթիկական չափումներով, «հավերժ բարեկամների և թշնամիների» գաղափարաբանությամբ մոտենալու և դրանց հիման վրա իր համար սպասելիքներ ձևավորելու, ժամանակից շուտ հաղթանակներով խանդավառվելու և դրանք չարդարանալու դեպքերում խորը անկումային տրամադրությունների մեջ թաղվելու պրակտիկան:

Նման ընկալումները ներհատուկ են ազգի ողբերգական ներկայով մտահոգ, սակայն իրավիճակի վրա ազդելու անզորությունը խորությունը ապրող անհատին, ով, տեսնելով իրավիճակի վրա ներգործելու ազգային ներուժի պակասը, ներքին անկազմակերպվածությունն ու պառակտվածությունը, հույսը կապում է արտաքին միջավայրի անշահախնդիր բարեկամեցողության պատրանքների հետ: Նման դեպքերում ակնկալիքների չարդարացումը շատ ավելի ցավոտ է լինում հենց նույն անհատների, քան մնացածների համար: Դրա արտահայտությունն էր նաև, որ 1922 թ. Կ. Պոլսից ստիպված հեռանալուց հետո Թեքեյանը, խորքային իմաստով ընկալելով նույն եվրոպական երկրների թողտվությունը քեմալականների կողմից Արևմտյան Հայաստանի և Կիլիկիայի լիակատար գրավման փաստի առաջացրած լրջագույն բացասական ազդեցությունը Հայկական հարցի լուծման վրա, սկսում է որոշ ժամանակով հեռանալ հրապարակազրական գործունեությունից՝ փորձելով ազգային հիմնահարցերին հետամուտ լինել կրթական, գրական-ստեղծագործական, որբախնամ ակտիվ գործունեությամբ:

Խորհրդայնացումը որպես գոյաբանական ընտրություն. համակերպման հնչերանգները քաղաքական իրատեսություն պայմաններում

Փարիզի, ապա Լոնդոնի (հետագայում նաև Լոզանի) կոնֆերանսների «քաղաքական գործարքներում» արևմտահայության ակնկալիքների չարդարացման փաստի հետ առերեսումը պատճառ է դառնում, որ 1920 թ. վերջերից, որպես

³⁴ «Արև», 31. III. 1922:

փրկողակ, արևմտահայ մտավորականությունը հայացքը դեպի Արևելյան Հայաստան ուղղի: Սակայն քաղաքական մտքի այդ շրջադարձը ոչ թե Հայաստանի Հանրապետության հռչակագրի հետ էր կապվում, այլ «չարյաց փոքրագույնն ընտրելու» սկզբունքով ազգային ազատագրության կամ փրկության հարցում բոլորից Ռուսաստանը քեմալական թուրքիայից նախընտրելի համարելու: «Քեմալիսթ մուրճը ստիպեց Հայաստանը Պոլշվիք սալին ձեռք առնել: Ասիկա ոչ ոքի համար չափազանց զարմանալի պիտի թուի: Մեզի համար՝ մաղթենք միայն որ մետաղը շատ թափթփուքներ ունեցած չըլլայ: Եթէ պահած է իր յատկությունները, ան կրնայ օր մը մեր ուզած ձեռք ստանալ նորէն»³⁵, – 1920 թ. Հայաստանի առաջին Հանրապետության խորհրդայնացման սահմանագծին նշում է «Ժողովուրդի ձայնը» թերթին փոխարինելու եկած «Ժողովուրդի ձայն-ժամանակ» թերթի խմբագրականի հեղինակը: Դա է պատճառը, որ ռամկավարական մամուլը ոչ այնքան կենտրոնացավ 1920 թ. դեկտեմբերի սկզբին Հանրապետության անկախության կորստի վրա, որքան ռուսական ընտրության արդարացվածության հիմնավորման: Անկախության կորստի հարցը մամուլի էջերում սրվում էր հիմնականում հակադաշնակցական քարոզչության համատեքստում՝ չեչտեչով պետական ինստիտուտների, հատկապես բանակի կառավարման անկարողությունը:

«... Կարսի առջեւ, սակայն, մեր բանակի բարոյական և ֆիզիքական սնանկություն հետ, անգամ մըն ալ յայտնի եղաւ թէ կառավարութիւնն ալ մնանկ էր և պատասխանատու ներկայ ու ապագայ բոլոր ճախողութիւններուն: ... Ահա այս պայմաններուն տակ էր որ եկան կամ հրաւիրեցան պոլշեփքները որոնք եթէ մինչեւ այսօր ոեւէ օգուտ չունեցան, գէթ փրկեցին հայ ժողովուրդը անխուսափելի վտանգէն ...», – նշվում է «Ժողովուրդի ձայն-ժամանակ» պարբերականի 1921 թ. հոկտեմբերի 14-ի համարում: Անկախության կորստի հարցում ռամկավարական հրապարակագրությունը, ակնհայտորեն ՀՀ դաշնակցական իշխանության և քեմալական թուրքիայի պատասխանատվությունն ընդգծելով, նրբորեն նվազեցնում էր բոլշևիկյան Ռուսաստանի ապակառուցողականության ու ագրեսիայի նշանակությունը: Ավելին՝ բռնի բոլշևիկացումը, ըստ էության, մատուցվում է որպես գոյաբանական ընտրություն. «... Եթէ Հայաստանի սահմաններուն վրայ պոլշեփքներ չգտնուէին, անհրաժեշտ էր որ ստեղծուէր այդ կազմակերպութիւնը, գերութեան այդ վիճակը թեթեւցնելու համար»: Ուստի Հայաստանի խորհրդայնացումը դիտարկվել է որպես անխուսափելի և օրինաչափ երևույթ: «Հայաստանը խորհրդային է այսօր և կապուած Ռուսաստանին: Ոչ ոք կը մեղադրէ Հայաստանը իր այս քայլին համար: Հայ ժողովուրդը իր ֆիզիքական գոյութեան փրկութեան համար ուրիշ ճամբայ չունէր, քան հաշտուիլ իրականութեան հետ»³⁶:

Ընդ որում՝ Հայաստանին ինքնիշխանությունից զրկելու բոլշևիկյան Ռուսաստանի ձգտումներին «բարոյական չահի» շղարշ էր հաղորդվում: Մասնավորապես 1920 թ. դեկտեմբերին «Ժողովուրդի ձայն-ժամանակ» թերթում գրվում է. «... Պոլշեփքմի հայրենիքը այնչափ միամիտ չէ որ սպասէ մենէ համոզուած պոլշեփքներ դառնալ: ... Անոր կը բաւեն Հայաստանը բնաջնջումէ

³⁵ «Ժողովուրդի ձայն-ժամանակ», 04. XII. 1920:

³⁶ «Ժողովուրդի ձայն-ժամանակ», 20. XII. 1920:

փրկուած ըլլալու բարոյական շահը՝ այսօր, և իր յետագայ ծրագրերուն համար քայլ մը յառաջ գացած ըլլալու գոհունակութիւնը»³⁷:

Թեքեյանն այս շրջանում ակտիվ հրապարակագրութեամբ չի զբաղվել, սակայն փորձել է Հայաստանի խորհրդայնացումն օգտագործել բոլշևիկյան Ռուսաստանի միջոցով Արևմտյան Հայաստանը փրկելու վերջին, հուսահատ նպատակի համար: Նրա ցուցումով ռամկավարական գործիչ Արտակ Դարբինյանը ժամանում է Թիֆլիս: Հանդիպելով Հայաստանի ԽՍՀ Ժողովրդական կոմիսարների խորհրդի նախագահ Ալեքսանդր Մյասնիկյանին՝ Դարբինյանը նրան առաջարկում է սովետական իշխանութիւններին օժանդակութեամբ Խորհրդային Հայաստանին միացնել Սևրի պայմանագրով սահմանազնված Արևմտյան Հայաստանի տարածքները: Սակայն առաջարկը Մյասնիկյանը մերժում է այն պատճառաբանութեամբ, որ Թուրքիան չի համաձայնի առանց պատերազմի որևէ տարածք զիջել, իսկ Խորհրդային Ռուսաստանը չի ցանկանա փչացնել հաբաբերութիւնները քեմալական Թուրքիայի հետ³⁸:

Այս անհույս փորձից հետո Կ. Պոլսում Թեքեյանի գործուն մասնակցութեամբ Ռամկավար-Ազատական կուսակցութեան առաջին ընդհանուր պատգամափորական ժողովն ընդունում է հիմնարար որոշում՝ քաղաքական անվերապահ աջակցութիւն ցուցաբերել Հայաստանում հաստատված խորհրդային կարգերին՝ «անոր տրամադրելու համար կուսակցութեան ոյժերը հայ ժողովուրդի ֆիզիքական գոյութիւնը պահպանելու, երկրի տնտեսութիւնը վերականգնելու և հակապետական արկածախնդրութիւններ արգիլելու նպատակաւ»³⁹: Սա կողմնորոշում էր, որին ինչպես ՌԱԿ-ը, այնպես էլ ողջ Սփյուռքի ոչ դաշնակցական հատվածը մնաց հավատարիմ ԽՍՀՄ-ի գոյութեան ողջ ընթացքում:

Ինքը՝ Թեքեյանը, Հայաստանի խորհրդայնացման անհրաժեշտութեան մասին հրապարակագրութեան ձևաչափով խոսել է շատ ավելի ուշ: «Արև»-ի 1928 թ. մայիսի 29-ի համարում հստակ բացատրելով 1920-ականների սկզբին իր պրո-ռուսական կողմնորոշման ռացիոնալութիւնը՝ նա Առաջին Հանրապետութեան հիմնադրման 10-ամյակի առթիւ գրված խմբագրականում պարզաբանում է. «Քանի որ բացարձակ անկախութեամբ բացարձակ վտանգի մէջ էր հոն հաւաքուած մեր մէկ միլիոնի չափ բնակչութեան կեանքը, մենք, մեր ազգին այլևս ուժասպառ ու ճգնաժամային այս վիճակին մէջ նախընտրելով անոր կեանքը անոր անկախութեան, գոհ ենք իր ներկայ ըէժիմէն՝ որ իր գոյութեան ապահովութիւնն է այսօրուան համար ...»⁴⁰: Իսկ 1944 թ. նոյեմբերին Հայաստանի Խորհրդայնացման 24-ամյակի առթիւ նա «Արև»-ի իր առաջնորդող հոդվածում գրում է. «Հայաստան, ուրեմն, քսանըջորս տարի առաջ՝ ... իմաստուն և փրկարար քայլ մը միայն առած եղաւ այդ օրը, որուն համար ալ պէտք է ամէն հայրենասէր Հայ մեծ օրերու յատուկ լուրջ և խոր ուրախութիւնով պարուրուի ...»⁴¹:

Ավելի քան ականհայտ է, որ Թեքեյանի համար, աշխարհաքաղաքական ու տարածաշրջանային առկա իրողութիւնների պայմաններում, ռուսական հովա-

³⁷ «Ժողովուրդի ձայնը-Ժամանակ», 04. XII. 1920:

³⁸ Դ ա լ լ ա ք յ ա ն. 2004, 37:

³⁹ «Ժողովուրդի ձայնը-Ժամանակ», 21. VI. 1922:

⁴⁰ «Արև», 29. V. 1928:

⁴¹ «Արև», 29. XI. 1944:

նոցի ներքո հայրենիքի մի հատվածի ֆիզիկական փրկությունը՝ պետականության որոշակի բաղադրիչների պահպանմամբ, ավելի առաջնային է դիտվել, քան Հայաստանի առաջին Հանրապետության անկախությունը ցանկացած գնով պահպանելը՝ որպես հետագայում պետականության լիարժեք վերականգնման հնարավորության նախահիմք: Պատահական չէ, որ նույն առաջնորդող հոգևածում նա գրում է. «Ապագայի բոլոր գեղեցիկ կարելիություններուն հիմն ու խարիսխը՝ ներկայ Հայաստանի գոյությունն է ...»:

Այլ կերպ ասած՝ 1918-ին Առաջին Հանրապետության գոյության պատմաքաղաքական նշանակությունն իր անհամարձակ անդրադարձներով, ավելի ուշ պետական սուվերենություն — ժողովրդի ինքնավերականգնություն կատեգորիաների միջև նախապատվությունների շուրջ հրապարակային մտահոսքի զարգացմամբ թեքեյանն էական ներդրում է ունեցել Հայկական իրականության մեջ պետականության գործառնական դերի վերազնահատման և այդ իմաստով քաղաքական մտածողության արմատավորման գործում:

Զսպվածության և պետականության վերազնահատումների համատեքստը

1918–1920 թթ. Հայաստանի անկախացման հարցում ավելի համարձակ և նախաձեռնողական լինելուն թեքեյանին խանգարել է երկու հանգամանք: Առաջին՝ տարբեր երկրներում սփռված և ինքնահաստատման խնդիր լուծող արևմտահայությունը չունեի բավարար տեղեկատվություն ու պատկերացում այն պատմաքաղաքական ծանրագույն իրադրության և նախապայմանների մասին, որոնք ուղղակի ստիպեցին արևելահայ քաղաքական էլիտային զնալու Հայաստանի Հանրապետության հռչակման դժվարին որոշման կայացմանը: Դրա մասին է վկայում, օրինակ, Հայաստանի առաջին Հանրապետության վարչապետ Ալեքսանդր Խատիսյանի՝ Հայաստանի Հանրապետության ծագման ու զարգացման մասին աշխատության կապակցությամբ «Արև»-ում 1936 թ. մայիսի 28-ի խմբագրականում արտահայտված զարմանքն անկախության հռչակմանը նախորդած՝ Հայաստանի շուրջ տեղի ունեցած իրադարձությունների առթիվ: «... անկախութեան» հռչակման մանրամասնությունները պարզապէս կը փշաքաղէ ոեւէ հայ ընթերցող: Այնքան զարհուրելի և յուսահատական պայմաններու մէջ է, որ կատարուած է «մայիս 28-ի աքթ»ը, իբրեւ առաջին յայտարարութիւն Հայաստանի «անկախութեան»⁴², — գրվում է խմբագրականում՝ ակամա բացահայտելով այդ առանցքային իրադարձություններից թեքեյանի ունեցած տեղեկատվության անբավարարությունը: Դրանով կարելի է բացատրել, ինչպես ասվեց, Սարգսյանի հերոսամարտն աննկատ թողնելու, 1918 թ. մայիսյան ճակատագրական դեպքերը պատշաճ արժեւորման չենթարկելու թեքեյանի վարքագիծը: Այս առումով էական դեր է ունեցել նաև այն փաստը, որ ընդհուպ 1918 թ. Հայաստանում մամուլի կայուն համակարգ չի եղել: Այն ձևավորվել է Հանրապետության կենսագործունեությունը հրնթացս:

Երկրորդ՝ արևմտահայ իրականությունում ՀՀ անկախության հռչակումն առավելապես ընկալվել է իբրեւ ՀՅԴ քաղաքական հավակնությունների բավարարման, իսկ ինքնիշխանության կորուստը՝ որպես հիմնականում ՀՅԴ կա-

⁴² «Արև», 28. V. 1936:

ռավարման անկարողության դրսևորում: Դա թույլ չի տվել իրադարձությունների զարգացումը գնահատել արտաքին ու ներքին բոլոր գործոնների օբյեկտիվ համադրման միջոցով: Մասնավորապես, «Արև»-ը Առաջին Հանրապետության անկախության կորստի պատճառ է մատնանշում 1919 թ. ՀՀ կառավարության ընդունած «Միացման ակտը»՝ դա նշելով որպես քեմալականների կողմից Հայաստանը թիրախավորելու և 1920 թ. Հայաստանի դեմ պատերազմ սանձազերծելու հիմնական պատճառ: «Պետական և միջազգային ըմբռնումով աւելի խախտողական և վտանգալուր «աքթ» կարելի էր երեւակայել: Ատիկա մարտահրաւէր մըն էր Թուրքիոյ մէջ ճշտորոտող և դաշնակիցներու դէմ ցցուող քէմալական շարժումին դէմ: ... Գիտենք թէ ի՞նչ հետեւանք ունեցաւ այդ անխորհուրդ «աքթը»: Թուրքերը յարձակեցան Հայաստանի վրայ՝ տարին չլրացած, գրաւեցին 1914ի սահմաններուն մէջ կազմուած Հայաստանի կէտը ...»⁴³: Թերթում, սակայն, անդրադարձ չկա, օրինակ, Հարավային Կովկասում բոլշևիկյան ներկայության ակտիվացման հետեւանքով ուժային հավասարակշռության խախտման, բոլշևիկների կողմից իրականացված կազմաքանդող քարոզչական գործունեության, Հայաստանում բնակվող մահմեդական տարրերի ջլատող ապստամբական գործունեության ազդեցության մասին:

Սակայն «Արև»-ում հետագայում Թեքեյանը վերաբերել է անկախ պետականության ձեռքբերումը պատմական հեռանկարի համատեքստում: 1928 թ., այսինքն՝ անկախության հռչակումից 10 տարի անց, անդրադառնալով մայիսի 28-ի խորհրդին, Թերթում խմբագիրը կատարում է կարևոր արձանագրում. «Տօնած ենք և կը տօնենք Մայիս 28ը, իբրեւ դարեր վերջ առաջին անգամ հայ երկրամասի մը վրայ ծագող ազատութեան նշոյլը՝ որ բաւական ուժով չէր տեսելու համար, և մեր ժողովուրդն, իր վարիչ կուսակցութիւնով, բաւական խելացի չէր զայն պահպանելու համար: Մենք զայն կը տօնենք համեստօրէն, իբրեւ պատմական իրողութիւն մը, այո՛, ուրախութեամբ մը որուն մէջ շատ ալ տխրութիւն կը մտնէ, և տխրութիւնը աւելի կենդանի է դժբախտաբար քան ուրախութիւնը»⁴⁴:

Թեքեյանի խմբագրած Թերթերը, ինչպես Հայաստանի անկախության, այնպես էլ հատկապես Հայաստանի խորհրդայնացումից հետո մշտապես ուշադրության կենտրոնում են պահել երկրի սոցիալ-տնտեսական կյանքը՝ դրանց անդրադառնալով թեմատիկ խորագրերի ներքո: Բուն անկախության տարիներին տեղեկատվության հիմնական աղբյուր էին հանդիսանում հայրենական մամուլից հիմնականում ժողովրդական կուսակցության «Ժողովուրդ» Թերթը, ավելի ուշ՝ Հայաստանյան ռամկավարական օրգան «Հայաստանի ձայնը», ինչպես նաև արտերկրյա լրատվական օրգաններ, ինչպես օրինակ, «The Asiatic Review»-ն կամ «Reuters»-ը: Ձեռքը դրած Հայաստանի զարկերակին՝ Թեքեյանական խմբագրությունը լրատվաքարոզչական օրգանների հիմնական առաքելությունը, բացի զուտ վիրավոր հայրենիքից աշխարհասփյուռ հայրենակիցներին տեղեկատվության մատակարարումը, նաև երկրին օժանդակության ցուցաբերումն էր՝ համայնքներում հանգանակությունների խթանման, երբեմն

⁴³ «Արև», 28. V. 1936:

⁴⁴ «Արև», 29. V. 1928:

նաև կազմակերպման միջոցով: Վառ օրինակը այն հզոր տեղեկատվական արշավն էր, որ թերթում 1920 թ. օգոստոս-նոյեմբեր ամիսներին իրականացվեց Հայաստանի կառավարության կողմից Սիյուռքում մեկնարկած 20 մլն դոլարի փոխառության ծրագրին (թերթն այն համարից համար գլխագրում էր որպես «Անկախության փոխառության» ծրագիր) գովազդային ու տեղեկատվական լայն աջակցություն ցուցաբերելով⁴⁵: Առանձնակի խանդավառությամբ լուսաբանվում էր այդ նպատակով Ալեքսանդր Խատիսյանի շրջայցը հայկական համայնքներով, և դա հայրենանվիրումի ուրույն, ինքնաբերական անկեղծ դրսևորում էր:

Եզրակացություն

Վահան Թեքեյանի 1918–1922 թվականների հրապարակախոսությունը սիյուռքահայ ինքնության քաղաքական վերարտադրության համատեքստում հայկական պետականության վերականգնման, ինքնիշխանության ընկալմաների սինթեզումն է, որն արտացոլում է արևմտահայության և Սիյուռքի ներսում գոյություն ունեցող գաղափարական բևեռացումները:

Սկզբնապես քննադատաբար տրամադրված լինելով Հայաստանի առաջին Հանրապետության նկատմամբ՝ Թեքեյանը հետագայում աստիճանաբար անցում է կատարում առավել ընդգրկուն, հայաստանակենտրոն միավորող ընկալման՝ դրան մոտենալով որպես հայկական հարցի լուծման բանալու:

Մինչև 1920 թ. Հայաստանի միջազգային ճանաչման գործընթացի մեկնարկն ընկած ժամանակահատվածում Թեքեյանի մասամբ հրապարակադրական, մասամբ քաղաքական գործունեությունն ընդգծում է սիյուռքահայ քաղաքական մտքի և մայր հայրենիքի իշխանությունների միջև գոյություն ունեցած փոխհասկացվածության ճգնաժամը, որն իր կիզակետին է հասնում հատկապես արևմտահայաստանակենտրոն և արևելահայաստանակենտրոն միացյալ պետության տեսլականների բախման համատեքստում:

Թեքեյանի հրապարակախոսությունը սրում է պետականության գաղափարի շուրջ ազգային համերաշխության հիմնահարցը, ինչն արժևորվում է հատկապես քաղաքական բևեռացման առավել սուր պահերին նրա դրսևորած զուսպ ու հավասարակշռված վարքաբանությամբ:

Հայաստանի առաջին Հանրապետության խորհրդայնացումը Թեքեյանն անցկացնում է ոչ այնքան ինքնիշխանությունից զրկման, որքան որպես հայաբնակ աշխարհադրական տարածքի և հայրենիքի փրկության հարկադրված պատմական ընտրության ուսման ճանապարհ:

Սիյուռքահայության իդեալիստական սպասումների աստիճանական փոխակերպումը դեպի զգայուն քաղաքական իրատեսություն, Թեքեյանի հրապարակախոսության մեջ ստանալով հեղինակային ինքնատիպ ձևակերպում ու իմաստավորում, հանգեցնում է Արևելյան Հայաստանի և խորհրդային իշխանության նկատմամբ հարմարվողական վերաբերմունքի ձևավորմանը՝ որպես ազգային ինքնության պահպանման և հետագայում ինքնիշխան պետականության վերականգնման էական հնարավորություն:

⁴⁵ «Արև», 06. IX. 1920:

Գոր Աբրահամյան – ք. գ. թ., դոցենտ, ԵՊՀ Ժուռնալիստիկայի ֆակուլտետի մեդիաուսումնասիրությունների ու նշանագիտություն ամբիոնի դասախոս: Գիտական հետաքրքրությունները՝ հայ մամուլի պատմություն, սիյուլոքահայ հրապարակախոսություն, հանրային հաղորդակցություն, նոր մեդիայի հիմնահարցեր, ժուռնալիստիկայի տեսություն: Հեղինակ է 2 ուսումնական ձեռնարկի և 5 հոդվածի: ORCID:0009-0009-8367-4257. gor.abrahamyan@ysu.am

ԳՐԱԿԱՆՈՒԹՅՈՒՆ

- Ազգային համագումարի նոր նստաշրջանը պետք է շարունակե նախորդին գործը. – «Ժողովուրդի ծայնը» (Կ. Պոլիս), 08. I. 1920:
- Ալաթյաճեան Ա. 1988, Վահան Թեքեան, իբր հանրային մարդ և հրապարակագիր, Բեյրութ, Թեքեան Մշակութային Միության հրատարակություն, 400 էջ:
- Այսօրուան տօնը . – «Արև» (Ալեքսանդրիա), 28. V. 1920:
- Ավագյան Ա. 2018, Վահան Թեքեյան. ազնվական քերթողը, Երևան, ԵՊՀ հրատ., 215 էջ:
- Արամեան Հ. Կիլիկիան պիտի ըլլայ Հայաստանի ծանրության կեդրոնը. – «Ժողովուրդի ծայնը» (Կ. Պոլիս), 19. IX. 1919:
- Արարատի անկախ հանրապետությունը. – «Արև» (Ալեքսանդրիա), 29. XI. 1918:
- Արարատի դրոշակը պետք է ծածանի նաեւ Տաւրոսի կատարին. – «Ժողովուրդի ծայնը» (Կ. Պոլիս), 10. I. 1920:
- Արծանագրուեցեք անկախութեան փոխառութեան. – «Արև» (Ալեքսանդրիա), 06. IX. 1920:
- Բարիզի հայկական համագումարը. – «Ժողովուրդի ծայնը» (Կ. Պոլիս), 09. I. 1919:
- Դալլաքյան Կ. 2004, Վահան Թեքեյան. քաղաքական-հասարակական գործիչը. – Հայոց պատմության հարցեր. գիտական հոդվածների ժողովածու, հ. 14, Երևան, ՀՀ ԳԱԱ պատմության ինստիտուտ, էջ 35–45:
- Դիմակը վար առնուած. – «Արև» (Ալեքսանդրիա), 31. III. 1922:
- Դշխոյեան Ն. Դեռ երես ալ ունին. — «Ժողովուրդի ծայնը–Ժամանակ» (Կ. Պոլիս), 14. X. 1921:
- Թեքեան Վ. Ազգային կառավարություն. – «Արև» (Ալեքսանդրիա), 02. IV. 1917:
- Թեքեան Վ. Ազգային պատուիրակությունն ու իր նախագահը. – «Արև» (Ալեքսանդրիա), 30. VIII. 1918:
- Թեքեան Վ. Յոյսի եւ յուսալքման պատճառներ. – «Արև» (Ալեքսանդրիա), 25. XI. 1918:
- Թեքեան Վ. Երեւանի բանակցութիւնները Ազգային պատուիրակութեան եւ հայ հանր. կառավարութեան միջեւ. – «Ժողովուրդի ծայնը» (Կ. Պոլիս), 21. XII. 1919:
- Թեքեան Վ. Բացատրություն մը Երեւանի բանակցութիւններուն վրայ. ինչ ուզեցինք, ինչ ստացանք. – «Ժողովուրդի ծայնը» (Կ. Պոլիս), 15. I. 1920:
- Ինչ վիճակի մէջ է Հայաստանի խնդիրը Բարիզի համագումարին շուրջը. տեսակցութիւն մը պուլկարահայ պատւիրակ պ. Հինդլեանի հետ. – «Ժողովուրդի ծայնը» (Կ. Պոլիս), 02. V. 1919:
- Ինչու դուրս եկանք միութիւնէն. – «Ասպարէզ» (Ֆրեզնո), 04. IV. 1919:
- Խորհրդային Հայաստանի 24-րդ տարեդարձը. – «Արև» (Ալեքսանդրիա), 29. XI. 1944:

Կիլիկիա պիտի ըլլայ Հայաստանի ծանրութեան կենդրոնը. – «Ժողովուրդի ձայնը» (Կ. Պոլիս), 19. IX. 1919:

Հակոբեան Յովի. Հայկական դատի ճգնաժամի օրերուն. մեր դիրքը Խորհրդային Հայաստանի հանդէպ. – «Ժողովուրդի ձայնը-ժամանակ» (Կ. Պոլիս), 20. XII. 1920:

Հայ ազգային համագումարի աշխատութիւններու եւ որոշումներու ամփոփումը. (պաշտօնական զեկույց). – «Ժողովուրդի ձայնը» (Կ. Պոլիս), 07. V. 1919:

Հայաստանը սալին և մուրճին մէջտեղ. – «Ժողովուրդի ձայնը-ժամանակ» (Կ. Պոլիս), 04. XII. 1920:

Հայաստանի անկախութեան բ տարեդարձը Պօլսոյ մէջ. – «Արև» (Ալեքսանդրիա), 14. VI. 1920:

Հայաստանի անկախութիւնը հռչակուած. – «Ասպարէզ» (Ֆրեզնո), 27. XII. 1918:

Հայաստանի անկախութիւնը հռչակուած. հեռագիր վսեմ. Պողոս Նուպար փաշայէ, ժողովուրդին խանդավառութիւնը. – «Արև» (Ալեքսանդրիա), 30. XII. 1918:

Հայաստանի անկախութիւնը պաշտօնապէս ճանչցուցուած. – «Ժողովուրդի ձայնը» (Կ. Պոլիս), 14. I. 1920:

Հայաստանն անկախ է, բայց Հայկական հարցը լուծուած չէ. – «Ժողովուրդի ձայնը» (Կ. Պոլիս), 16. I. 1920:

Հայկ. անկախութեան տարեդարձը Կալկաթայի մէջ. – «Արև» (Ալեքսանդրիա), 21. VI. 1920:

Հայկական հանրապետութեան տարեդարձը Բարիզի մէջ. – «Ժողովուրդի ձայնը» (Կ. Պոլիս), 02. V. 1919:

Հայկական հարց. հանրագիտարան. 1991, Հայկական հանրագիտարանի զխաւոր խմբագրութիւն, Երևան, 348 էջ:

Ղազարյան Ի. Ծ. Վրդ. 1984, Վահան Թէքէեան, Լոս Անջելէս, G. Printing, 138 էջ:

Մայիսի 28. տարեդարձ անկախութեան. – «Արև» (Ալեքսանդրիա), 29. V. 1928:

Մայիսի 28-ի մասին. – «Արև» (Ալեքսանդրիա), 28. V. 1936:

Մեծ հանդէս Վիեննայի մէջ Հայաստանի ազատութեան առթիւ. – «Արև» (Ալեքսանդրիա), 25. VI. 1920:

Միացյալ Հայաստանի անկախության հայտարարման ակտ. – «Աշխատանք» (Երևան), 03. VI. 1919:

Նոր ազգային պատուիրակութիւնը. – «Արև» (Ալեքսանդրիա), 18. IV. 1919:

Ռամկավար ազատական կուսակցութեան կիրակի հաւաքոյթին շուրջ. – «Ժողովուրդի ձայնը-ժամանակ» (Կ. Պոլիս), 21. VI. 1922:

Վերջին լուրը. – «Ասպարէզ» (Ֆրեզնո), 27. XII. 1918:

Bhabha H. K. 1994, The Location of Culture. London, Pub. House "Routledge", 285 p.

Hofmann T. 2011, One nation – three subethnic groups. The case of Armenia and her Diaspora. Yerevan, Pub. House "Narek", 106 p.

Горохов В. М. 1975, Закономерности публицистического творчества (пресса и публицистика). Москва, изд. «Мысль», 190 с.

Кройчик Л. Е. 2015, Диалоговые ресурсы публицистики. – «Вопросы теории и практики журналистики», Иркутск, т. 4, № 2, изд. «БГУ», с. 139–148.

Мисонжников Б. Я. 2000, Отражение действительности в тексте. – В кн.: Основы творческой деятельности журналиста. С. Петербург, изд. «Знание», с. 95–122.

Полонский А. В. 2008. Публицистика как особый вид творческой деятельности. – «Научные ведомости Белгородского государственного университета», № 11, с. 56–61.

ПЕРВАЯ РЕСПУБЛИКА АРМЕНИЯ И ПРОБЛЕМА ПОТЕРИ
НЕЗАВИСИМОСТИ В ПУБЛИЦИСТИКЕ ВАГАНА ТЕКЕЯНА
(1918–1922 ГГ.)

ГОР АБРАМЯН

Резюме

Ключевые слова: Ваган Текеян, публицистика, Первая Республика Армения, Армянский вопрос, Диаспора, национальная идентичность, Западная Армения.

Восприятие и интерпретация Первой Республики Армения в публицистике известного западноармянского, а затем диаспорального писателя, публициста, общественно-политического деятеля, яркого представителя армянского либерально-демократического политического течения Вагана Текеяна (1878–1945 гг.) рассматриваются в контексте Армянского вопроса, восстановления национальной государственности, а затем – утраты суверенитета. В рамках отношений между идентичностью армянской диаспоры и национальной государственностью особое внимание уделяется роли публицистики Текеяна в формировании политической культуры Диаспоры, определении национальных повесток, а также переоценке идеи всеармянской солидарности.

Исходя из социально-политической аналитической функции публицистики, выявляется эволюция идеологических позиций Текеяна – от первоначального критического отношения к Первой Республике Армения до признания её в качестве ключевого этапа в сохранении армянской идентичности и восстановлении государственности.

Сквозь призму публицистической точки зрения Текеяна также рассматриваются идеологическая поляризация западноармянской и восточноармянской идентичностей, утрата надежд на западные державы и формирование относительно лояльного отношения к советизации Армении. Эти тенденции свидетельствуют о развитии политической мысли Армянской диаспоры от идеализма к реализму, а также о становлении гибридных форм идентичности между Диаспорой и Родиной.

Гор Абраамян – к. филол. н., доцент, преподаватель кафедры медиаисследований и семиотики факультета журналистики ЕГУ. Научные интересы: история армянской прессы, армяно-диаспоральная публицистика, массовые коммуникации, проблемы новых медиа, теория журналистики. Автор двух учебных пособий и пяти статей.

ORCID: 0009-0009-8367-4257. gor.abrahamyan@ysu.am

